

四庫全書

集部

欽定四庫全書

集部
見素集卷十七

詳校官中書臣瞿 煦

中書臣劉源溥覆勘

覆校官中書 臣汪學金

校對官助教 臣蔡 鎮

謄錄舉人 臣張仲芳

欽定四庫全書

見素集卷十七

明 林俊 撰

墓誌銘

明進中順大夫致左長史事抱獨郭先生墓誌
銘

嗚呼汲汲於名者猶汲汲於利也離形去智君子與其
晦而病其矯道有真也而居之有易俊得吾抱獨郭先

生焉先生襟度夷坦軌物柄世未見其不能今也藏至
介于休休之容措施大致抑尤今以少也郭出汾陽之
孫嵩之後徙郭坑徙大蜚又徙郭滄歷叅軍義重承務
道卿教授廷煒三以孝被旌命紹興至正之間宣教李
孫廷煒弟也徙吳埭歷存良生長史宴又徙玉井生先
生徙東關以讓諸弟卜耕濱居焉諱紹字思緒號思軒
抱獨別諸俊昭令潛也長史名長者治旗尾之田以食
具私公為鹽筴虧輸之償力時置先生承以學子之金

并脫其內人簪珥以盡室常懸磬長史與楊宜人未嘗掛一念不足之憂既入官豐養二親厚其葬諸弟婚娶生齒日繁公私費日以大教諭紀分教纓之庠序服物皆出先生匱則任舉責又任其代其友舉責至為代償積逋餘五百金先生宦橐一洗又盡棄其旗尾之田心力俱困諸弟未嘗掛一事不足之憂久之知先生力無足庇已也謝不能弟請分猶東走連州授學徒入其金分給之官之俸又給之百盤一葉竟之其子不盡支先

生歸私語俊曰猶貧俊曰先生無愧官力又未億奚不藉數歲之俸先生曰吾年已踰六骸骨故鄉有大于是者未再歲先生果不支而野飲社會款洽諧笑歌聲嗚呼然出金石若忘其貧與其身之既老也嗚呼其可謂達矣一官竒貨燃箕而闕墻者聞先生風何如先生經學尤精詩文嚴永有思致為李翰林敬所林郡博元深二門高弟林僉憲長深林都憲秉仁一時齊名二公第甲科先生獨第乙科竟之宦業相頡頏義利嚴立界畛

貧而濟曠墜而舉顧無所於靳在金谿構射亭垣射圃
植松栢于學之主山在滑拓文廟正之皆由俸酬直以
歆感其令教法莊整旁庠數百里方方然來在太學生
徒尤相結太宰林泉山為司成尤取禮信晉世子居攝
先生日進格言以忠蓋受知莊先王薦進左長史加四
品服色又進中順大夫父奉政大夫母與配林皆宜人
受有誥命故事封冊婚嫁祿米有常儀先生既主司柄
一意謝絕令行無擇冗要嬖臣弄舞竟正以法世子薨

世孫已先逝世曾孫沖幼有密謀攝府事者先生曰然則處世曾孫何地約束浮費諫止供佛翊導四世有鎮定扶正之功焉先生既不可留宴餞殊數等以示優異平生公府不入有附為重以自濟者先生曰是何與于我吳久歿無子家病疫先生日視無苦同年黃以禮病疫先生視藥舟中叱死倡賻財為斂為歸其棺以葬老僕朝祿樸謹病聾先生為立妾生子以副室蔣所養女為配文賦亦龍壽藏成為別營附焉嗚呼先生於一厚

要之終身倫紀故無瑕類俊與吳都憲世忠通判弟侃
族教諭弟哲甫僉事弟典皆屬陶成方易簣耒俊曰凡
以屬汝嗚呼其何能副先生耶正德甲戌以上去正統
庚申閱世者七十有五年噫亦壽矣夫子景雲娶趙又
娶林景行邑庠生娶王景龍醫學訓科娶吳女嫁蘇善
卿孫秉元秉虔秉鈞秉哲女五人吳已附于姑景雲奉
先生與林同穴則乙亥也纓狀事行詳俊錄其大如此
銘曰兩以奇分均氣範形歧而異之奚有弟兄我通其

宜連荆是似孰是刑于暨厥婦子繫先生道訓薄弗諒
厥官諒厥族載視厥姻暨友若僕繫先生行斯卓

明進中奉大夫江西按察使耻庵周公墓誌銘

正德甲戌元日之又四日耻庵公病且革命出歛服飾
棺授遺範既畢日就申端坐而逝乙亥將葬具孤儉以
諸孫宣之狀請銘公諱軫字公載世為清江上廊周氏
周故裕家自香山處士樂施與傳累葉以基有來慶公
季父鶴洲知府諸兄轍主事宣復為御史郎乘文學者

數人族父翠渠布政其子大謨進士鄉聚文物一時周
先焉公嗣祖則川不祿父諱越亦不克年祖妣鄭妣王
皆樹婦節鄭被有旌典公植立孤梵中自異起鄉薦入
國學以學行為司成持知名遂重六館取會魁第進士
為戶部主事得所想像屹不可攀及被延接直訥鮮文
而刑型老格樸根骯性靜範情儉訓俗於古而近之矣
庇民經國運若無奇而弊隱以去成化乙巳元日京師
星隕有聲公上言誅元惡以快人心減內臣以干朝政

正朝廷以正百官罷進書以願養聖躬親儒臣以論道
經邦重科道以糾劾官邪杜僥倖以振作士氣量進鮮
以差撥船隻同時言者多取忤左官公獨以質厚受容
猶留滯滿秩始進郎中時西北遞饑延及荆蜀而南濟
之無其策公合羣僚白之長疏借藩府奏乞場蕩聽民
取一年間有陳辯公執之堅纂修憲宗實錄以文學被
選采輯在戶部者以進京師大水南京大風雷詔詢時
政闕失時侍郎劉公璋視筮收采羣議公言天子藏富

於民皇亦有莊顧示以小非稱宜與民否亦宜革管庄
如例畝限三分責民入租有司解部以進劉公以為然
疏入留中公有山東運使之擢鹺鹵易漏與滌公循源
塞孔定為格歲旱奏蠲其半寧海場鹵縮奏捐其引增
永利場足之政成譽起賢能之旌屢上進階與誥贈其
祖若父皆大中大夫山東運使祖妣皆淑人配陳封淑
人公方以老成負物望而年已踰六兩致其仕不報會
致仕加職例行再請始進嘉議大夫江西按察使今上

嗣位又進中奉大夫在林下者十有七年自持耿特終
其身構族祠增祭田校定手著濫竿存稿為若干卷典
則莊永不隨俗氣格屏山為周葬所公葬淑人因營壽
丘立歸全菴遊息焉晚年體益重閉門養靜斷迹城府
姻鄰殆莫窺其面予歸自蜀公特為予周旋語窮日未
休記西曹以言及禍公與林公大猷廖公用中屢獨吾
門及疏誅元惡與予指相和應平居道義之與澹如也
非謂不為翕翕之態勢異有望者耶公壽八十一二子

一女七孫三曾孫碑詳焉嗚呼化局新淳源愈異吾又
幸夫璞之未剖木之未災于耻菴及識焉銘曰磅礴兮
蜿蜒青松兮誰宅祔祖考兮玄堂繫形骸兮斯索海嶼
兮沙村滙一水兮誰門與鬼兮偕來幔亭兮子孫月陰
兮為期我庄兮伊邇竟經兮來遊樹鱗鱗兮石齒齒下
上兮四方雨雲兮相從離氛兮釋垢化雙鶴兮雲之中

明毅城林母封太安人姚氏墓誌銘

鄉抱真守持可歛畏者數人其一汝敦汝敦名典予族

也同趣尚以今五十年歷六官在有奇績家落落猶常
其固君子哉其喪太安人也輟廣西按察僉事來奔前
數月過家為壽太安人出其半面觀者謂福壽為宜筮
日奉慎齋公贈京判黃贈安人與太安人封命告祠下
太安人冠帔即次觀者又謂福壽為宜既禮成汝敦戀
戀未置太安人強以行巡右江方起有風望問亦尋至
噫其如何乙亥附慎齋以葬慎齋予銘也茲復以請太
安人中沁姚氏中沁之姚與穀城之林竝名家林世以

盛姚坐陳公繼之累謫戍克忠死於戍太安人父也太
安人逮事慎齋秀水分教之行郡丞公穀與柯宜人己
老安人請身留侍請太安人以從舉典舉冊舉二女慎
齋師儒表律太安人柔儀有格以無難刑于之化引情
體義以意為準量戚疎賤良酬施皆合無替敬亦無替
愛盡婦盡母以食子之成生有封歿有贈族里有耀楊
山草樹隱隱然光氣太安人病若無苦一日屬冢婦閱
歛衣遺珥剩服散而盡人以為早竟奄奄如夢正德甲

戊九月十七日也去宣德乙卯壽八十孫應祥應祺應文曾孫永通永迪永謨孫女曾孫女七嗚呼方慎齋世短孤幼滿前身後事如漆容知有典今日耶飲美者宗其原晉長沙公侃恭勤忠順台人林侍郎鶚廉慎好禮湛程二母之教不誣抑有感夫成虧之數者矣絡秀屈節于周生顛李落門以興姚同時坐累其可勝指耶黃敦信當歿入外弟方郡伯鯉匿其二女以竝適林氏伯為中丞元甫公母贈淑人叔為郡丞思承公配封宜人

子茂達復為憲副黃亦因以起以予及見太安人三焉
命物之成固無得例已之也銘曰孰通其源孰塞其支
脉而出之玄津渾而海枯陸沉溫戶斯落作潤德門蘭
階有馥安貞終慶應地無疆一真斯藏月耿夜長

明亞中大夫廣東左叅政烏門黃君易庵墓誌

銘

易庵諱顯字伯望龍坡烏門黃氏上世見予記其祖教
諭公謨廣元生祠父封員外郎公綱墓誌君沉毅內植

外美無足動人起進士為戶部主事機神開朗疑難徐折一言而定同事目為老斷留心政理繙閱部牘叅格例以備知國計委輸京儲而權舟臨清也部為之一重感畹賜第復造君疏止曰臣為祖宗惜法為朝廷惜財為某家惜福孝廟陰納而中具疏周公經為戶部尚書擇賢自助得今侍郎邵公寶與君掌章奏同心在公奏駁無擇柄要部事改觀周用以不安于位君內艱服除復為其部員外郎轉郎中與長異意出為肇慶知府治

以廉平恤孤焚抑豪右行平糴為民當怨繩蕉布官市
之擾溝黃桐圩橋之水不害稼號黃公溝時廣盜幾徧
而肇尤盜區獻計者欲屠而盡君曰吾玉石分之諭諸
落無為盜襲故者羣械之肇人神城隍神令誓無仇方
師聽之無枉方當以法繫以待讞三數年間獄死數百
人肇得以不煩大師以帖安其雞犬人稱快鎮巡屢最
其績以旌素仕者入衛帥某之賂欲代官養子君持不
可會外艱去撫君治盜坐以酷屬所私諭意賂免時賊

瑾羅織禍動連身家知舊強君曲處無能為副仕竟聞
君業伸辯自度無能攜懣懣然如夢至杭而返就獄甘
心焉一日忽出君復其職則知御史劉君祥劾仕受賂
數十事首及君寃君白而仕逮繫補武昌未數月擢廣
東左叅政連推右轄竟以仕吠滕其聲部不獲已更其
任至潮病以弗起正德乙亥二月二十九日也年五十
三嗚呼士固有弗終者矣方仕媒孽時如墮湯火容玩
視耶蓋棺事定數百年短屋歲食僅裕可欺耶君治肇

無繼者治武昌無前者治廣無為竝者斯名士夫私論
與下屬萬口而同者也仕固足信哉君介特有識崇尚
風教包孝肅陳白沙皆為立祠陳君茂烈苦行兩許其
子以女割田周其族皆所謂難者予許君可任大事今
已矣失君者獨人然哉配鄭氏封宜人有婦行僅生二
女子應軫與三女出唐應庚出張後君十月不舉丙子
臘月甲子祔先員外廣化右臂以葬鄭君岳君趣味者
狀甚詳予獨悉任事告失君者銘曰嗚呼易庵羣和獨

指吾無容喙為子之所廣屋一漏厥庇孔多吹毛刮垢亦如子何青蠅加點其然其然合抱寸朽吾無子之寬其日其天

少子迂壙誌

正德庚午見素甫年五十九起征藍是歲九月迂生報至驚喜甫三子未孫老子亦良慰也歸見之眉目秀異膚玉色聲音洪亮清遠四歲隨塾兒讀孝經大學一日食菓戲索之意靳甫曰不孝迂應聲曰罪莫大於不孝

驚異之試摘一二字叩之凡所經讀與所聞羣兒讀能
一一援引無漏客試為常自是慧性日開容止日老成
道見者必問誰家蘭玉甫諸子獨慰意私恠其母蠢且
陋無應是兒甫福已踰分亦無應是兒又惟吾林積
德之厚甫雖無合于時亦或孚于天故有是報乙亥冬
盡痘作夜惟長噓其母問之曰迂苦姐又曰迂謝姐姐
何所歸與奶求阿兄為子如是種種皆自訣之詞但不
明言死耳痘八日不發以天丙子正月五日也嗚呼自

謂相償豈知相戲劇耶行猶多未慊征藍之行殺人多
累汝耶汝雖短不謂非世吾家起息汝其一占矣不謂
徒鍾情也葬汝公媽墓右自撫汝我死祔公媽以葬亦
撫汝汝母自能為地汝可無憂惟朝夕無見汝嬉笑者
前自意汝盡讀吾書無望矣雖自割能已耶噫其何情
父見素甫忍泪誌

明通議大夫都察院右副都御史林公豫齋神

道碑

吾家都憲豫齋公之巡撫雲南也以末疾請老者三上
難之與驛權就醫于家在牀褥者三年正德戊辰年六
十四以終時逆瑾擅柄大臣卒無敢以聞瑾誅始聞賜
祭賜葬季子有孚輒監察御史來相葬事葬之紫帽山
配陳合焉公成化乙未進士選工科給事中充占城冊
封正使以言罷遣同列蕭顯等言事臣姓名屏間一日
付吏部與外公以母憂先去獨免既之代正使者死海
上副使論死責戍識者有以知造物之曲為公地服闋

吏部亦為之所注南京禮科給事中父憂又去服闋弘
治時也復禮科給事中陞禮科都給事中論列時出畫
可定國本攬朝綱謹好尚節公費黜不職言甚切當而
阻汪直王越之謀進土魯番之貢甚力擢山東布政司
左叅政畢情民隱而舉其荒政時議稅額石增五升備
荒公曰此箕歛遺意利緩而病切在民竟無歛王妃葬
大治瑩域公以制自執比付他官民素田遂為瑩有于
是怨有歸而公之風力愈重撫巡交薦之擢雲南右布

政使轉左陝西火篩孔棘區畫兵饗忘為勞而調發飛
輓民不為毒撫巡又交薦之擢都察院右副都御史巡
撫四川屬川寇發一麾平之有金幣之賜番夷殺守路
官公獲兼倍而其首僅遺言者劾總兵輕事而謂公緩
賊與貴州易撫代者至欲炫已功投意兵備市夷兒斷
首抵賊為功為言者所彈始明公之不欺孝宗悟移撫
雲南將收而入之而以疾告諱普長以字元甫行更字
秉仁林出九牧而同子邵州公系昭度之世秀眉豐頰

美髭鬚軀幹脩偉山立而玉潤在班行無過者立心務厚而居以渾晦謀預事先聲與惠流所薦引所白僚友之誣無知者在平原建董仲舒書院在蜀祀趙清獻公與文翁李冰張忠定並祠尹恭簡王端毅稱遠器韓司徒文力汲引時吾閩諸老皆在南而年頗近迫予任直取忤位遇詣極私以屬公鄭司徒紀曰容色大麗嗚呼謂非相非與公晚益完粹予起征蜀公遺德在人雲貴之聲往往能道者居家儀則來進所歆發弟哲甫教諭

子有恒都察院都事有章尚義階有孚與從子有年並
為御史有年疏止取佛謫丞有祿郡同知孫大呂大選
郡庠生與大道大嚴大旦蘭立筭出孝義載振鄉賢列
祀父良弼初封工科給事中妣黃配陳封孺人再贈父
並祖宏泰皆通議大夫都察院右副都御史祖妣李與
妣與配皆淑人繼配孔封淑人記京師公與黃公文器
林公長深黃公汝亨及子道義相許與最後獨予二人
年壽相匹公又歿耶銘曰十德九刺邵州奕奕開先忠

儒孝弟永錫有煌厥似而美斯觀如嶽之重如玉之寒
昔在諫垣諤諤暨暨于宣于旬于是倚毗乃都中臺乃
殿西服士有詩書農有絲穀三藩嘉靖帝念勞臣程脩
步跼委運還真臚臚仙原爰有卹章為龍為光日星發
祥

明京闈進士雲霄吳子玉墓誌銘

雲霄吳子玉之卒子尚幼及是始舉葬事吾莆黃郎中
伯固為具事狀陳御史時周為之請銘子玉父侍郎公

道本齒子允行而仕頗同時公舉子玉頗晚有奇兆名
之夢麒子玉頗幼慧五歲誦書八歲工對偶九歲作思
鄉題壁二詩十歲授以時文而自及古文錄賈誼治安
策讀之熟公異之一任縱觀經史百子擇之師師為之
屈既之師吾友戴主事伯綱伯綱曰奇才奇才最後又
師吾師少師西涯翁翁之子徵伯名才名子玉直欲頡
頰無畏而友其高弟子何少卿子元趙編脩爾錫許給
事啓衷在太學又友謝僉事邦用與吾時周高視倫輩

決擇名流于千古之上厭松雪軟媚并其人少之而病
遺山膚近太白意若麗靡詩之學遂歸唐音祖少陵叅
以邵庵文主東坡又主老泉其學凡三變變輒檢其稿
曰梨栗閒稿曰棄餘錄曰南還雜稿焚之殆盡斷自戊
申以後為杜庵弘治集七卷與端一齋總錄五行前用
稿以留子玉好收錄遺書朱墨點校做做窮日力意若
直任文事無疑而性尚孝謹治公之喪準禮而哀至賜
葬成遂廬其側調事母林淑人所生母林俱得懽心廣

義莊立義塚建義塾先急匿瑕因力以施厚利鄉井席
其庇盜亦間為之感竟賚志以逝正德辛未歲也年僅
三十九嗚呼快劍吹毛僅收京闈之一利自况賈誼殆
未然者昔元賓猶舉進士得太子校書子玉無遇殆過
之僅與子安昇之之敏才短札為類夫香楠文梓皆棟
材也而或天斤斧踣勁風得收夫材者殊幸獨子玉然
哉斯愛才之益悲也伯固之狀可傳予不復論次而特
哀其死以洩予悲子玉曾祖某祖某皆贈戶部侍郎四

子承中心承孝承文承武承忠今為國子生墓在某山某
向具葬丙子十月銘曰孰挈而精為日為星孰扶而英
為風與霆忽御鯨以孤往繫駮虬而上征槐南昔夢笑
蓉故城子懷兮激烈昭遺兮堅貞

明中議大夫替治尹致廬州知府事孟公墓誌

銘

國家武戡文治蕃育休息垂百年理極亂始於是乎有
土木之難孟主事玆首受刃矢貫其臂墮叢屍中瀕數

死不死公起正統己未進士歷戶禮主事有風力名戊辰鄧茂七寇沙尤蹂閩之下上屠戮如割草管我師失利勢益張公陳攻守至計集三省之兵屯新城屯潮陽屯江山大兵出鉛山蹴延平諸路並應筍魚置免誰則逃之朝叅用其議命將出師己巳六月神機之兵扼順昌俘茂七以獻沙寇平上杭銀冶疲人釁盜歲輸率不當歲費公言當塞竟塞易儲之議章郎中綸鍾御史同爭尤力同杖死綸死復蘇幽之獄公繼有言自分茅焦

之滿人數而禍偶無竒隱悟固然耶抑羨藜徒慘無足忠義伏也英皇帝南內三年羣臣無得一朝謁公因早極言忤旨知萊州又知廬州治本古意滯宣化流而郡幾無事因得授所學學子民則有守學者得其師而竟守急流之退歛竒贏子姓晟鼎嵩鑄鎮邦傑三世鄉進士七人公述作為盛山房類稿其什一存者字廷振號靜齋孟出臨淮徙鉛山元砲奕百戶者曾祖萬戶者伯祖皆失其名諱再世没于陣祖德浙東金牌元帥歸

附我太祖立戰功既守閩城之太平坊家焉父文叔封
戶部主事母葉封安人配張亦封安人陳其繼公生永
樂壬辰正月十有八日卒成化丁亥九月二日子昺景
邑庠生俱卒次畢季即嵩公卒後始生陳抱節撫教今
同知臨江香岩五十年既拱之木勒有新銘顧嵩也女
適沈縉孫希韶希文希介俱庠生與鍵鈇而五曾孫淮
瀛與邦傑洛潛演而六玄孫嵩屬鄭少谷善夫請銘少
谷故予畏臨江子弟南雄壽州舊義宜銘惜歲久亡闕

猶幸其大者未泯遺直遺愛人口猶熟也善完者不責
取造物之忌天之定殆有以必之於先者矣蔽牛無所
用薰天之焰轉瞬灰寒公則異於是銘曰宅之固夜之
長雲車風馬竟所鄉往以復伸之始玉精發祥動松梓
明中奉大夫浙江布政使司右布政使三渠陳

公墓誌銘

陳公子居諱仁三渠因其有自號也錦墩揖壺山為勝
猶歷孟庸允德贈郎中舜衡甫以鍾發于公一時羣從

第進士成化戊戌庶吉士邦瑞公始之丁未公繼之已未今憲副邦器公又繼之初公在諸生與陳大叅寒月稱二陳寒月得之敏公矯惰為勤資深而輔之博為任提學獨賞果發解首寒月名第二為進士為戶部主事採輯實錄東廣督軍餉淮南兩以郎中吳宜人憂讀禮廬次引渠鑿池與鄉族同其利示巽定以為習先再為主事為員外郎郎中畢力問學作古文詞自副而國計明習不腐不漏不喑嘿自容隨俗養交取巧化大僚大

章奏多出其手闕里災公疏重脩省闕異端抑奔競禁
奢侈振士風收人心端教化正風俗禮部災疏早朝勤
政審決章奏訓養東宮進君子退小人節齋醮嚴備邊
又疏雪冤獄紓忠憤罷江南織造復御史彭程官給事
中林廷玉補外勿遣又疏致仕布政使林同蔣雲漢方
守知府潘琴宜優異妖僧領占竹黃緣內降宜勿取陝
西守臣進古璽又疏其偽且謂果秦璽亦亡國廢物宜
毀勿留皆關切時諱朝紳為動容孝廟多所嘉納今上

初司徒韓公文倡伏闕請誅嬖閹鼓怒逆瑾中之力文致公公誤落三官并落韓以去公同知鈞州再知汝州轉南京兵部員外郎掌其武學方是時政如東濕諸司易守為全身遠害之計公委而任之以無失故常瑾誅起浙江提學按察副使權量精審公案手自披閱不付吏積勞成損轉為其藩叅政疾已作尋起尋復既之哭內氏李宜人又復疏乞休致吏部錄賢勞擬進其藩右布政使致仕命下公卒已彌月正德甲戌三月十七日

也上去甲戌壽六十一李先二年生亦先一年以卒十月二十二日也公謹質沉永事郎中吳宜人甚孝於物無競而分義時嚴不欲涉事累以分所學齊家衆督耕傭節縮諸費以倍取殷裕皆屬之李成子懋鄉進士嫁其翁憲卿方員二女抱育大夏大序大節三孫與四孫女李與為力予重愛士每臨文歆異與聞論列之大致心與之牙頰吹鼓忘其跡之疏員曾監還省父方伯公于蜀取道于浙也具書屬意偕謝良勤公炳炳然世責

縈念景仁不起君實終于位仕處殆有然者懋治瀨溪
瑩成以丁丑某月某日奉二樞以葬以鄭君山齋狀請
銘讀之終篇又得三渠稿天津志閱之盡同聲落落有
餘慨焉銘曰昔在孝皇于闕四聰公起版曹允茲素忠
竒請匪極卮漏胡繼弗善為同時乃邦計有學有仕有
騰厥聲睽時來賢抑邦之楨黨禁于嚴決茲首領弗震
弗搖徐觀厥定靈淑百祀繫公其完遽挈而還瘞玉雙
阡碧峰峩峩鳴和並舉言集于梧庸告孫子

明奉政大夫南京戶部郎中致仕自庵王公墓

誌銘

成化戊戌進士三百五十人莆十人故事責占年狀王公自庵直署曰年四十或諭自隱則笑曰自此至致仕三十年足矣尚忍欺同時循資躐次取美官公一尹五年始召召則以父喪歸服除念母老留終其養服又除年六十矣猶強為親贈命起南京刑部主事三載贈父廷梁公如其官階承德郎母陳安人尋進南京戶部員

外郎郎中同時在任籍者無幾南都僅劉公忠江公瀾
韓公重李公善胡公富皆長僚皆賢公無能為地正德
戊辰年七十致其政莆同時壯者物化少者老以謝公
倒蔗榆景以保有完名掃軌養重于松深竹野之間間
苴屨觀稼莫知為官人亦不欲取村叟異也始從兄夫
林司訓授經百遍僅僅成誦誦則無忘而意義了了文
字亦典則李翰編敬所許其成果成遂安始上三日囚
穴獄出公曰是不相諒過在予民則無罪囚蒲伏自歸

治本愛恕徵輸有常期訟曲直積誠開譬如恐或傷尹
上宰稱爲慈良刑戶之推讞出納准之權舟如是而謹
加至焉平生同色而言擇足而後動心近厚迹近晦取
名近廉家素饒卧不重褥食不二羹馘雞鳴盥洗正中
衣端坐可謂敦篤君子矣諱瑄字朝器以字行更字大
器王出瑯琊之後自長慶入閩居南安徙九峰又徙鳧
山家焉端平乙未特科第一人公八世祖也諱聲叔曾
祖諱伯履祖諱原遠與主事公世有潛德公生正統己

未九月乙亥卒正德甲戌十一月己未年七十六配陳
贈安人繼陳封安人女六子特晚踰五副室魯始舉鈍
林舉銘舉錘猶及見觀覲覲三孫與二孫女遲而收殆
然也前旬日過予約相壽丘業往而訃至驚愕悲楚生
其足恃耶赴弔而卜赤泥之原位申而寅面尤於居近
為宜公寔中陳寔左繼與副以位為預其葬丁丑某月
某日林世正林有章陳桂吳文博林應期林清其壻銘
曰外槁內腴矩步繩趨皙而長軀山澤之臞負天絕雲

棲棘奚慕長風上征已乃末路何老謂郎躡哉是翁有
晚于材匠石是逢退讓芑芑神理所右惟拙之收亦遲
之有

明尚義官梅峰曾君墓誌銘

古者宣氣阜物以為天下利四其業通之于是乎智運
猷材効事以其業名若今曾君朴軒又殆出于是之外
少孤家落年十六走閩走粵走二京及遼時逐無巧貨
舉息輒倍不數歲家族並因以起事育婚嫁有餘給先

祠禮有餘舉歲之祀有餘承義塾型治才子弟為多因能以授之事聯綴州縣仕籍外之施賴舉火數十家預祕器副人急殆數百人公修擇委僕僕無倦厭出已以盈官縮與公租之代納殆二百金免息省息貸無酬殆千金其最盛五百金市田兩庠以優士餽龍江貨入甲者評直乙者繼以至翔五百金挽之竟與甲饒之賈王鏐劉騰邂逅質三百金不留券待選魚墨偽券請質竟為之隱亦竟感其酬然猶無足副泛以間取些短其不

齊情也夫羸織之所積猗頓監鹽丙氏鑄冶烏氏之蓄
牧君孰多循例散官與販脂洒削領縣而鼎食良異然
能散率無逮君紆憲駕表宅里登之郡乘其取重固宜
君諱德字崇賢系朱宣靖公之後由晉丞安仙遊徙莆
而族曾祖德本祖麟父回妣黃配康康子良寶尚義官
娶陳女鄭大廷其壻劉生良中郡庠生蚤卒娶陳良弼
亦郡庠生娶林琚治士業聘陳皆宦家其季璜始生屬
撫視于陳又屬教成于兄既二日正德丙子八月七日

君卒赴吊悲楚蓋至是定矣墓在常泰里仙螺溪之雞
籠山位辛揖乙四窀君中左康自華岩遷而合左右為
劉許壽藏丁丑月日以葬以康郡倅恭之狀請銘傳宋
清者謂清望報遠不害為富究其施無逮君遠甚為報
殆未必然噫可觀世矣銘曰筭斗自縈鍾休漏寂孰當
其炎舍焉以息儒名市行廢箸執籌不市之道允也其
儔公有助傭士有餘粟孰脫烏鳶承乃桂玉有紓其急
而釋其懸孰是心存命士則然錫有院章紆有藩轍彰

義特書日星綽楔仙螺胡有有澗有岡有曠若光扶桑
發祥

見素集卷十七

欽定四庫全書

見素集卷十八

明 林俊 撰

墓誌銘

明資政大夫刑部尚書贈太子少傅諡文肅椒
丘何公神道碑

椒丘公之卒弘治壬戌臘月俊巡視江西時也遺命屬
文墓道之碑春二月公配吳夫人先卒敬皇帝賜葬祭

公例得賜祭合葬之典俊疏公完德邃學宜贈諡并乞
諡文猶有阻者嗣是吳給諫世忠申論今正德丙子廣
昌令張濂又再論上曰何喬新學行俱優始終全德贈
太子少傅蔭子孫一人入監既又諡文肅嗚呼論至是
定矣俊得以假靈卒役公者公出宋寶謨閣直學士文
定公坦之裔吏部尚書東園公文淵叔子第進士為南
京禮部主事家艱復起歷刑部主事員外郎郎中福建
副按察使轉使河南轉湖廣右布政使都察院左副都

御史巡撫山西兼督三關以功轉左入為刑部尚書御史鄒魯謀躐大理南京刑部尚書又入為刑部尚書御史鄒魯謀躐大理丞公薦魏紳會公外氏與鄉人奏訐魯遂誣公與聞當道右之已之訊無驗公乞致仕魯尋謫外尋又以罪論死為天下快言者累疏起公不果嗚呼論無待是定矣公字庭秀少穎異年十一二通鑑道無遺病陳子桎續編書法卒曹彬包拯不書官呂文渙降元不書叛張世傑溺海不書死節紀義軒附不經之談書遼金失內夏

外夷之辯為周殿撰中規所竒而沉晦周謹時然後出
言動必儒賢為準具學以窮理為先博物洽聞為輔正
心脩身而措之家國天下為期自公之隙目存心寄盡
在書有異種輒從假錄藏書至三萬卷忘其疲與其身
之既老文章援據經史謹厚而簡則所著宋元臆見周
禮集註椒丘集所編選文苑羣玉續編百將傳勲賢琬
琰集秘終其身間梓行之天下孤介嚴冷法執是確不
可移積忤袁錦衣伺之無其隙大僚大奏讞大制作皆

出具手在閩奏減銀礦課額蠲半租以無病在民而寘
其稔惡土豪尤者交番薛者于獄在河南黜貪橫有強
援守者一人令者二人趙甲飲陳乙酒肆歸而溺諸河
甲之子訟乙毆死誣服公讞之曰肆櫛比民居毆必有
聞去河遠負亦必有以見驗果拾甲沙泥乙得辨開封
並郡竟歲飢故事賑至秋公令連賑麥實乃已前後安
輯南陽賑荆襄一再賑山西全活不可勝計南陽招回
復業十四萬人附籍六萬餘戶北虜犯邊設伏灰溝橋

斬獲甚衆又犯邊殺邊將畿輔震驚紫荊居庸尤急公往經略練兵立險為必搗老營之計小王子聞而遁播州楊友謀宣撫遂謀奪宣慰誣有反狀公往訊具得其奸奏誅其黨數人革官銷印而遷友保寧其它疏還留守奪民蘆洲革官校私駕帖禁京師胡服胡語錄罪囚第徭役行賤糴經猷注措皆翊正國是贊畫泰平之大端雖未能盡副人意要所謂異同公者殆非公人也國朝父子尚書何為盛識者議之范之文正忠宣可謂世

澤之綿弘治初與王端毅三數公稱大老可謂人望之
重嘗兩得疾敬皇帝命醫診視遣中官賜酒米蔬肴可
謂眷遇之深雖祿世二品已即貧而義利界畛截不可
犯鎮守分惠市舶遺財輸之庫武都司感薦已有文犀
之贖楊宣慰聞謝致飲器秘具皆不納平生氣節友彭
惠安文學友丘文莊以為知己而聲色澹然晚年喪某
某二子僅一弱孫吳夫人強為立妾舉某舉某邑庠生
孫某監生嗚呼公之隱無愧矣或疑公若涉隘夫繩矩

之間寧有餘地公壽七十六墓去其居百武者再銘曰
天惟純佑光啓盛明有毓碩人于邦之禎岡鳳誰孽藪
麟誰種靈芝無根醴泉獨涌聯休嗣淑有本有文貞霜
夏冽粹玉冬溫上宰崇望總茲銓鏡執虛懸平神力內
定秋卿式似繼總邦刑幽隱照燭噐驩順成國有甫申
家乃摯陟弗震弗搖並是遺直縉典申錫華褒是宜有
訶若神舊德在茲

明中順大夫南京國子祭酒晉江虛齋蔡先生

墓碑

虛齋棄提學按察副使歸晉江也上起以為國子祭酒
居之南京命未至卒正德戊辰十二月二十三日也噫
今亡矣先生子道義厚樂石之文先生之意也諱清字
介夫蔡出惠安東林舊望逮處士惠遷晉江傳貢士祥
傳潤傳封稽勲主事翁允元傳先生孱脆骨立而警悟
絕人髮就總盡屈其師裹糧數百里從三山林憲副玘
學易得肯綮以盡成化丁酉發解首辛丑試禮部為劉

翰編戲獨賞索不終試例不收誦其文士夫為熟又三年取進士以疾在告起為祠祭主事改稽勲主事轉驗封署員外郎王安人喪既除復主客署員外郎轉為南京文選郎中既乞終養得自盡主事翁者彌月服又除即家拜江西提學副使未幾乞致其仕凝重端永操養力專而進取之念故畧初友甯永貞孫九峰拜何椒丘願為弟子既又友儲殖庵楊月湖好古獨信貞風淵軌使人躁息妄消嘗曰吾始念一靜字既又念一虛字自

覺安便不費力又曰學宜養正性持正行聖賢言語熟復深玩則舊去新來日改而月以化又曰前輩何嘗不教人舉業義理充拓發由中之蘊彙括以時文之式自然神采動人奚必搜竒索隱取難字為工官閒無見措施而易有精詣學子請益所至屢恒滿官所恒數百人泉之易寶出指授一方文物之盛實始焉先生不謂無其時無其命雖未盡儒者之用有教人數世之澤祠先生泉人之意也先生天性孝友心盡而力逾勤四世之

葬未慊改遷以為魄之慰先晉安驛丞鄭者子先生舅
之子翰以去舅竟神主無依先生徧求得之蕭山則鄭
已有子業歸翰翰卒收其骨挈其妻子以還其他總功
強近葬無歸時其衣食家室凡數人詩文自立氣格而
論以理勝所著易蒙引三十八卷四書蒙引四十卷河
洛私見一卷通鑑隨筆一卷虛齋稿若干卷生景泰癸
酉六月十有八日壽五十六配缺氏封安人既生存畏有
心疾屬某以佐家政生存素存微存遠存儒存畏鄉

進士與存素先卒存微存遠邑庠生孫缺先生寢疾勅諸
子治後事門人飲以粥麾去曰吾欲內潔噫其可謂定
矣訃至予為位而哭先大夫之喪不及遠也其葬以征
蜀不及赴也祠雖與在經畫視晦翁於正獻巨卿於元
伯韓富之於徂徠餘愧矣交之道何如墓在鍾廬山某
向銘曰圖象蘊靈網提鑰啓孰躡而前粵有廉陞道術
為裂邪論售神儒名墨行孰與偽真河洛伊緜川途改
塞孰引其流以坊其決人豪天授有發其夢水寒藍出

有易其東溫陵一時震迅揚厲與風俱還儒術之衛

明國清林樸軒張孺人墓誌銘

林自回年館穀艾軒子姓師事之希聲遠調流響至今
雖雌伏林下猶老格疎風轉角回宮和應若與穀翁尤
鏗然者翁娶柳東先生女弟承之方翁之子廷諭樸軒
娶孺人為處士處常孫女又承之張貞質素性守禮而
能貧時破屋穿漏志期必立任織作千方相樸軒以樹
藝之事而自主其蠶牧皆化縮就贏倍于地者顧弗能

及事育賓祭公私無廢舉人事棄及珥鈿而徐輔以節
久之家稍裕屋亦就新謀立妾以時鬻子樸軒意若有
待既果舉文俊今編修也清穎幼慧方易齒伸紙據案
踈宕數千言誼傳士夫為異孺人請樸軒養之晦專之
師擇友以為麗澤間命饁田畝使知立家之難編脩甫
冠發解首取庶吉士授今秩報至孺人曰吾患弛于成
志以仕而奪也既就養見僦屋以居假乘以為出入朱
氏婦荆布無改心為慰翰林穀膳大官有常供朱進為

養再進曰其留饌賓吾欲兒官貧其為汝恠官所織作如初朱請專為勞不可曰吾性所安也編修書史稍倦曰翰林學為職兒績効在茲門徒候講阻其出曰書生日可愛也方須有封命以暴疾終垂息拳拳省身積學之誨正德乙亥七月十一日也壽六十七蒞諱父曰孔堅母^缺氏女適吳德隆適朱國賓者先卒孫男女具一男曰宗翰丁丑閏月舉扶里之新墓山祔姑以葬以朱氏女從豫屬狀伯固而於予銘墓嗚呼孺人非樸軒良友

編修良師資者歟素門賢淑之擇儀範足多矧共還舊
觀以及見清華之盛種樹者世乃成孺人相攸樸軒固
與所事而回年延致艾軒盛其伊始矣銘曰一以二分
流形散氣坤職于柔有翊內治懿懿孺人含章有貞恪
勤將事庭屏無聲委分食貧延休萃祉孰揭而提于落
以起繫盾璿式于圭于璋於發厥祥星日之光維缺之
妻維奎之母終來有他有孚盈缶魚軒改夕輶蓋啓晨
有復假靈于天之申

明旌表孝廉文林郎監察御史梅峰陳先生墓

誌銘

正德乙亥陳先生如賓書林墳成明年丙子得目眚哭
母封太孺人張氏加疾謂山齋曰吉凶未可知吾平生
所事見素所友執事又甚謂予曰畢竟如何予曰吾而
兄也勉就樂以觀天意私叩其家無一新衣為之密備
甫畢氣絕十二月十有六日也是日天氣慘黑道路流
歎吊者皆失聲先生無子予立其族子遠揚為後與松

匡山齋治其喪守馮君以棺來助越明年正月六日遠
揚奉張奉先生暨配贈孺人鄭氏以葬墳土未乾德人
先逝噫其如何士民具純行羣請之守帥言之巡按王
君應鵬以聞禮部覆可蓋坊賜額表宅里進之鄉賢以
祀月給米以卹其家始先生以孝廉為吏部所知奏食
學祿養母辭繼以布政使陳君珂薦上特嘉清苦月賜
米三石資養又辭上溫旨諭受及是命三曠典也先生
諱茂烈字時周陳為瑞安大川顯姓曾祖伯洪功陞興

化衛總旗傳慶四又傳贈吉安府推官善祥為先生父
父卒先生甫十四歲家貧忍食以飽黃氏祖母讀書時
夜分黃憫其羸喻止遂輜燈默誦究心道學作省克錄
自考黃卒易所居資其餘直買山碧瀨以葬二喪親負
土石壻成間日一視久之三五日一視哭盡哀而還胡
憲副榮重古行禮為子師會試道遇劫徒附之者幸在
抵京如封付之附者請半先生曰某者去君者存何半
太學試第一進士出使東廣盡却贖金修禮陳白沙因

領靜一之誨退而與東所私論難吉安持大體開至誠
通以民彞之懿豪家利寡婦財誣許婚斷從守志夫制
悍妻嫁有娠之妾既生子歸承其業族人爭之驗與姊
氏為類爭者媿服時張守本以嚴擊強徐輔以寬當道
尚深峻徐開解為霽信浮上下官有賢薦而民有去思
郡誌列在名宦考績歸至淮以乏寒且凍幾死所知覆
以敝裘為救為監察御史袍服樸素借騎一牝馬身若
無官而自係風紀之重尚書侶者子受賂崔者以道士

起皆根植自固言者屢劾先生再劾佞去而崔猶留先生以母老乞終其養供母外短床敝席不辦一蚊帳身治畦一蒼頭給薪出則執小油蓋妻子服食粗糲一女適彭惠安孫輔嫁具涼薄皆人甚不堪而泰然自足日坐斗室究極五經四書之旨體驗心身隨得隨錄常曰儒有向上工夫詩文特土苴耳孝廟上賓與予相對慟哭逆瑾亂政相對憂憤至羅織重罰以恣毒士夫先生曰某僅有死耳予起征藍先生杜門養靜悟領深而充

養熟隱衷粹行對天地質鬼神鄉國有懼先生知為愧
予嘗評第物品黃憲管寧之右得在孔門可幾閔冉程
朱高弟子無讓焉薦者謂廉約如石守道而養獨純孝
行如徐仲車而所處尤困殆未足盡者予始識先生諸
生韓洪洞問莆人物予曰從吾又問以先生對韓曰以
莆再指一書生耶予曰是友自純家居相信尤深每晤
言躁慮消熄宿疾為頓愈先生亦惟予言獨契嗚呼由
今其復斯人耶予既誌其壙又銘其墓其先生私耶張

自序
卷十八
壽八十九先生壽五十八墓五窀封孺人蔣及余壽丘
預焉銘曰化樞物治陶靈範精光氣之會公得其清星
爛日章後先輝映迨宋宗儒于斯焉盛公有正悟意往
神趨靜存動克一真自如搜竊記聞亦敏則有探幽索
微玄象誰友世局斯下邪論崩湍始風聿還亦允斯觀

明奉直大夫南京翰林院侍讀學士靜觀吳公

墓碑

文章漢劉揚班馬而下唐二家宋四家其間負豪樹勇

與之角要皆一時翹楚國朝文明以止昭回下飾潛溪
東里嗣照而聯聲迨天順甲申十八庶吉士之選盛矣
甫與者陳常卿愧齋吳學士靜觀愧齋溫純爾雅公瓌
竒佚蕩限韻命題卽席聯句動輒數百言豪詞警語如
壯濤激浪飛雪走雷雲觸山而電迸發同時文正公西
涯峰回海立公直欲相長雄無畏風稜孤峻不屑取雷
俗當其意略分忘年間有未愜意氣衰冷言語為之無
味以故躡收巧化率無公銜名官幾三十年僅一與實

錄金綺之錫由檢討而修撰諭德皆九載後遷又三年
朝論滯淹以久始侍讀學士署而南君子以為得立官
之介公雖文字職業而決擇內定宿所知與無間賤貧
每長篇短章伸紙立副自他時有干購必覈事是非人
望實可否不為勢隆赫儀幣豐腆易素君子以為植已
之嚴其修實錄也要人子寇者賂優其父半詞公曰苟
為是負所學員朝廷他日何以見董狐地下君子以為
得持論之公兩領會試同考所得多名士會元儲公殖

庵其尤者也諱衍字希賢以字行更字汝賢吳自沈坡
徙鰲峰又徙東井父諱熊有鄉行封檢討再封南京侍
讀學士母黃有內懿與配朱俱封至宜人公事親孝謹
而友其弟希亨以厚嘗一乞歸省歲時致俸金火綺食
品之奇猶惴惴然屬心曲于弟以為親慰竟之肉未寒
而家遽落平生無他嗜好書卷不釋手有惠本必閱之
盡然猶酒未忘情予鄉國特愛思有以忠之公為予止
三月竟以知舊復勸復飲弘治戊申予赴滇南公載

餞我于龍灣舟次泪油油若弗勝嗚呼謂竟是訣耶已
酉五月二十八日也壽僅五十三赴聞孝宗念儒學之
臣優以祭既之二親亦長逝谷清蔡山之葬子彰符彰
武彰憲強為力今惟彰憲乎在二孫正誼正宗二曾孫
某某復始錫類將有泣中書之石而著紹訓之書者矣
嗚呼公文章為莆立幟名家落落擅響者誰與假之年
又可知也昔人論退之元賓之至謂不在壽夭之間夫
元賓之才其誰則限之使公而在文正將不怙怙然文

宗之席惜公亦為莆山川靈氣惜也位遇諳極其將誰
計哉序而文之碑銘曰莆始自唐文昌發祥日杲星寒
有曄具光豹躍龍翔鸞鵠停峙公起詞垣嫡宗是祀蘭
臺芸閣疲神役精奏彼金石羣喧寂鳴公時舊學亦古
良史侍直帝旁妬生于美物不尚全才名忌盛並收兼
容天子之聖維世孔縮維名孔修維生以弗酬維後之
收

平南碑

國家起自江南撫帝王之中國文裸被冠裳櫓巢襲我
廬宇航浮索引之國竄負以歸職貢維南徭牙互湖江
廣之間姓名漏在民版乘間竊發三邊罹其害今天子
方巖內修舉外攘北平劉趙西平藍曹南平胡徐及王
黎獠之在東者平無虛歲徭以為畧已也寇郴桂仁化
上猶數十縣俱震于是有平南之師授都御史其柄韶
陳公金主之贛王公守仁主之衡則鳳山秦公金陳元
老壯猷二公則文武為憲者也時方有偏鎮香爐山之

苗之征公擇能授計而自解郴桂之急偕鎮守杜公甫
巡按王君度謀同以其兵屬叅將春統之三司魏贊之
璋濟由郴進庭爵質由桂陽進宗仁英臨武進翰璧進
自桂東青餽餉鳳璘而覈其功實於度公馭中青戰丁
丑十一月至于閏月連破其寨峒若柵九十而畸擒其
偽大王龔福全斬其偽總兵劉福李斌若首若從與屬
而俘者凡三千而餘焚賊屋千區牛馬器械無數二公
韶贛之功稱是征苗之師亦以成告捷聞上璽書褒獎

加公俸錄一子為世百戶邊人悅喜願立石紀功德古者治夷宜畧斯近土之夷出入為梗易之師田有禽利執者也而決勝靡遺是謂丈人之吉采芑美方叔以見周宣中興之功平南碑不可已繫之詩曰粵在禹服甸侯要荒綏處文武華夷之防維時山猺入我障塞鷓義矯處作我蝨賊王者無外合是以容來柔來馴息其詩凶維昔有苗言格干羽徐方具來亦戍師旅維徭罔念卒玩以狂擇肉輔縣翼虎斯張帝念邊人懼茲慘毒雨

燐熒熒寃鬼夜哭咨爾臺臣其總朕師錫之弓矢玉書
銀符公時征苗擇可以蒞選將練兵物馬功器有赫申
令宿戒其鄰如雷如霆三方以征何神天至寇是大寤
魂飛計窮縮如蛭蝻外示猶鬪厥聲弗雄戮其魁酋活
其眊童會應機投策無遺筭匪臣之能蔡功之斷言釋
其俘以訓以教胡不藝樹偕我衣食胡不貿販偕我經
營胡不絃誦偕我太平維時南荆文物上國胡襲曠頑
以赤其族維帝之威亦天之怒遏其亂源章我王度南

荒既平八方肅清歷服無疆天王聖明

明襄府左長史食正四品俸進階亞中大夫慎

齋吳公墓誌銘

五侯天龍吳大姓族焉青緋肩望入國朝鄉進士者八
人進士三人進士慎齋始也諱宏密字慎夫少從提
學吳憲副授經悟領殊到重以文體獨典異為先生獨
賞曰子之矢殆無虛發病多自阻僅之閩省一試禮部
一試試輒收例得顯選獨乞授教授以便養二親在處

庠者五月起擢右長史署之岷藩又署襄藩質木畏謹
廉不近名強直而不近矯以竟取知重襄憲王疾亟諒
公惻款受遺二長史輔政意尤于公乎屬公事定王如
事憲王尤取知重薦左長史食正四品俸定王薨又事
簡王如事定王在輔導者三世舊學宿望孚于上以信
乎其下左右涉有奇請恐恐然公知府之政内外乎肅
道用行物久時化亦有以預燭先事之幾者矣解政重
不得請托掃松以避居于家猶時悒悒色憂人莫知為

隱簡王薨世王愆違為其下所發一府皆曰吳公在無此其速公還公還開道以檢身維家臨政大防而遠其佞幸獍狻可厭惡者府用無事時巡撫王公第府僚殿最獨公乎與韓公簿青府獄獨無連及于公弘治丙辰公年六十二請老益堅王惜其去宴賚優常令諸臣不為格餞江上傳致繼勤官校護抵家反命為慰觀者歎嘆間有淚下乙丑詔進亞中大夫優游林壑與野老相周旋者餘二十年王屢書存問有金幣之賜同時進士

榆景之收聚無及愧齋靜觀述作之盛幾頡頑慎齋集
在焉曾祖師傳祖德懋父體舒贈奉政大夫修正庶尹
右長史母鼓山梁氏贈宜人配亦梁氏封宜人節謹善
相公盡于外宜人盡乎內以致隆二親之養之葬之祀
田之備先業既盡歸伯氏猶損祿賜以時益具羸舉嫂
氏之葬量其餘為族里之給先世所助海橋石折厚金
為易人於是義公亦於宜人乎重生宣德乙卯歷正德
丙子壽八十二梁生後四年前卒弘治戊申壽五十一

子三天麟衛庠生娶黃天驥娶梁其季天駿上殤天麟亦前天子族子尚義嘉績其壻孫梅楫楷標彬梯孫女二可塘之山位癸者墓公壬申所營葬宜人祔以天駿者也戊寅臘月日天驥業公乎合祔以劉氏副室因嘉績以予族諸兄知府舜卿之狀請銘公之詳具姻里子長湖憲故熟也昔董仲舒兩相驕王所居而治病免以壽自終殆亦有同者予未任劉向氏評其任是銘銘曰有塞其涂容軌非故外視若徐隱乃若鶩居謙處下戢

采攸宜孰是其盈顧益以卑師席未煖藩相特遷弼亮
正色曰時汝賢在鈞惟甄在鎔惟治視侯運化別浮於
雅羸豕躅躅曰時與幾色斯以舉二疏之微既多受祉
亦介眉壽廣川斯前亦允斯後

明封君桃村鍾鶴侶墓誌銘

正德丁丑季冬四日鍾封君鶴侶卒鶴侶故處士而曰
封君子善經起進士節推恩及御史恩尋及輟以侯故
曰封君也鶴侶少治舉子業弗收棄之而委業于弟光

澤令華也于子御史君也聯穎茂而蒙養之間多有所
成喜為詩與騷人韻士商摘其隻字半句風格勁頗
不類山林言旁涉虛中鬼谷之術推人貴壽窮天語良
驗寄懷象外自放之丘壑之間曰吾無辱為榮無繫為
樂松雲吾巢烟水吾性鶴其吾侶矣號鶴侶人曰鶴侶
也就養于蒲趺坐斗室倦則時壺山而瞻對之一日賦
數詩為贄以見我雲庄澗中長袖翩然野鶴遂與據榕
根燒茅柴具脫粟酌以鶴侶之篇序小像替之因信荒

寂有人而御史之賢有嚴君焉諱恕字勉仁自金陵入
廣五易地而順德桃村族焉克文生德廣德廣生康康
生曉為樂溝丞鶴侶父也母梁氏鶴侶有至性刑于梁以
正位于內健施順承家庭衍衍以無愆于度姻族時式
鄉之闕取平焉華善經既仕籍數數然寓書以無速官
謗華宦久屬留祿餘隨杖屨相其祠事其可謂知本矣
生天順乙亥三月二十九日壽六十三子即御史娶黎
其仲善綸娶吳善綸先卒邵景星張文明其壻孫曰繼

俊繼傑繼賢繼儒已卯月業啓寔某山以葬位曰某日
曰某卜之曰吉御史函狀具書哭拜授使者來莆請銘
僉臬王君時行書為速昔有召醫于充充追德其父速
醫以往御史德故在莆銘其父莆之欲也庸僉臬然耶
顧子亦莆民辱遊父子間尤未已者銘曰洪源易位弱
水在東有委其逢弗諱以窮自我非我任達胡病古丘
累累孰愚與聖升落淹速容執其幾福謙與順神理斯
宜平驚聯翔前征後起揚芬宣靈門祚之始玄罔韞璧

長夜冥冥有須襃潛有紀斯銘



見素集卷十八

欽定四庫全書

集部

見素集卷十九

二十

詳校官中書臣瞿照

中書臣劉源溥覆勘

覆校官中書臣汪學金

校對官助教臣蔡鎮

謄錄監生臣丁緯

欽定四庫全書

見素集卷十九

明 林俊 撰

墓誌銘

明尚義官洋城林公質庵墓誌銘

子兒時林公質庵以察使子入郡庠買屋吾聯桂以居
與先都憲相友善若親弟弟配黃孺人與先淑人亦通
慇勤若姊姒然蓋同出於林亦同出於黃也公常寘子

膝間孺人菓食之後數年公解學籍尚義冠帶遂還洋城城府跡甚簡至則先都憲為供具道尋事為色憂為謀宜子之妾最後陳果生公瀕薛生女嫁李穆者公是時年踰五望六先都憲具書語予喜甚予辭右轄居於家公以公瀕來見禮為三加賓字之景行娶方大叅璘女連舉文昂文楫二孫人曰公善人天其果定矣弘治癸亥二月公遽有公瀕之哭痛不可忍病數月以終十二月初九日也生宣德己酉四月一日年七十六公瀕

僅一十有九方氏婦年方二十有一矢志婦節以鞠育
二孤立林氏茹荼集棘剛男子殆弗能堪方視無苦正
德己已啓深瀆之藏塋公及黃及公灑及公無子之妾
王氏癸酉又乞其父大叅狀事行屬其兄太學生員以
二孤來乞銘則稍稍長知讀書識禮度矣員曰妹氏不
為慈廢教督之甚嚴予摩撫哽咽幸且深悲之嗚呼公
懸注公灑久目存心寄恃以自解者何限而竟失之其
如何二孤呱呱寡弱婦又出紈綺之女身後事殆不可

憑庸知方如是烈耶天終祐善門奇其遭以張其節如
此公孝子闕下之後銀青光祿大夫杓之子應始遷洋
城十有六世為月月生榮以察使初恩贈按察僉事察
使諱坦母鄭氏贈宜人繼朱氏封宜人兄弟九人公序
第三蕭母出也諱銅字尚遠長身鶴立口訥不能言體
不勝衣擇足而後動服御樸素積厚而藏以深非媮賔
旬日不出戶限見者不知為富貴公子尤盡孝故道處
兄弟利不先窺身獨勞無怨姻黨之貸不責息必酬族

之貧衣食教導之仁厚恭謹之譽播於族以流於鄉邦
以達於其邑若郡倚信之授以事數數謝弗堪洋城斗
門圯且瀕公居則出當其任財節事妥郡守王公弼禮
勞之延致鄉飲賓席嗚呼公藏才於晦非迂左者醇源
伊鑿猶幸若而人在羲皇世謂無懷者非歟銘曰粵在大
初溟滓未牙二五紛錯物彙乃加智鑿巧剋原本非故
公壽渾樸不文以素恬養韜默而以義肥百動攸寂拙
巧同歸一崔業傳來遲去速猶綫脈存宗祊斯屬烈烈

新婦栢舟死矢畢力二雖不我有已勒銘幽貞亦載奇
蹟後千斯年永視茲石

明資善大夫太子少保刑部尚書彭惠安公神

道碑

弘治乙卯資善大夫刑部尚書致仕彭公從吾終於家
正月十一日也訃聞孝宗敬皇帝哀悼贈太子少保諡
惠安遣官諭祭而經紀其墓之事墓之新亭丙辰臘月
十七日也某既誌其略於壙又序公之文以傳矣及是

正德癸酉公冢孫郡庠生輔請文於石公諱韶鳳儀其
字其先自戊公五世居涵口而益積於體正於思孝二
公則公祖父父也皆贈通議大夫都察院右副都御史
祖妣陳妣林皆贈淑人公父故儒者代門生陳燮名舉
責竟代償五百金產幾於盡父歿妣負口食之虞公從
容開譬授徒以續其匱景泰丙子舉鄉薦明年第進士
為刑部主事員外郎郎中憲廟朝疏言張燮不當為僉
都御史宜用王紘李秉葉盛副人意言周遵不當以貴

戚奪民田傷國本宜還民再下詔獄賴言官論救得釋
為四川按察副使疏言藩府葬祭差中官勞擾行藩司
便為廣東左布政使疏起陳獻章為翰林檢討疏總鎮顧
恒取方物監舶韋眷請均徭六十戶充私貢非宜俱見
停減最後言梁芳弟千戶採禽鳥花木擾民忤旨調貴
州居九月擢為都察院右副都御史巡撫應天蘓松等
處入為大理卿坐論星變過直道改舊職巡撫順天整
飭薊州等處軍務值天象示變疏言時政及糧運數事

孝廟初臣僚交薦王端毅公及公數老人望當顯用端毅起為吏部尚書公為刑部右侍郎奉詔巡視浙西劾罷守臣一人尋兼右僉都御史整理兩浙鹺政疏言浙西鹽利倍浙東而浙東亭戶抑配尤甚宜定折價之輕重及減溫處課額事竣還朝做鄭俠流民圖圖竈戶窮苦狀以進進吏部左侍郎與端毅莊凝重靜人不敢干以私庚戌彗星見天津疏言正近侍慎官爵厚根本減役錢其正近侍謂內臣言輕重能為禍福今利源盡出其手

分例相沿虛名實支誰能詰之凡章奏允而後下無復
論奏是失政體也有犯多從寬免有毆人死不問有論
死尋原是失刑柄也第宅服用踰制蓋祠請地非分之
求曲允無禁死而葬至與銀八千兩望折其氣以服其
心職務終於所司威福必求已出未言午朝祖宗勤政之
典乞師其意惟議經邦急務如有大陞除有大災異有
大邊報工程囚犯於御前評議可否不惟國是定事體
熟而羣臣邪正優劣自辨孝廟嘉納為刑部尚書安遠

侯柳景總兵兩廣賊累鉅萬為都御史秦紘所發公抵
以法景挾威晚干內降擠紘公執如初竟不能奪會旱
求言疏言會議荆庶人奏及他奏間踰旬日方得上旨
恐涉少斷內使王萌苗通高永犯死得充淨軍恐殺人
不死無復畏憚乞勤政守法宮中府中為一體昌國公
墳塋宜量減工程陵戶勇校等役宜量限優戶權璫憚
厭之連摘曹屬細過怵公公不為動以疾在告既連喪
濬漸二子密定憲三孫衰以漸累疏乞休上勉留再四

命近臣以醫來視既之椒邱去端毅又去公益孤去意
益決甲寅六月復疏者三上憫公懇誠特賜允命乘傳
以歸有司月給米二石歲給人夫四名為國愛賢者猶
望公卒佐明天子興太平之治御史宗葵等復羣薦之
朝然公亦疾以老不復能當世責矣生宣德庚戌九月
二十二日享年六十有六元配繼配皆黃氏贈封皆淑
人以卒濬鄉貢士婦陳知縣裕女瀚奏授嘉興縣丞婦
楊僉事琅女再婦卓察使天錫女女嫁余主事徵子楠

輔濬之子婦陳御史茂烈女實則瀚後也公問氣收之
吾閩而闕之國家豐亨之運學以儒者為宗省察性情
清其心以求聖賢氣象澄潤淵永人莫窺其際方不忤
物廉不近名容禮若甚溫而嚴冷自不可犯弱冠出已
意作長義攻舉業者宗之鄉薦學故有贖金諸生輸納
良苦公始卻遂為故事鄉國物品在人在刑部屬屈儕
輩直出其上四川樹植風紀燭伏稱神明開邑劉者與
其族爭里役陰嗾安岳扈氏焚滅其家男女二十有一

人死府久不決公訊而服定遠曾者乘其從兄避盜掠家財以去比覺聚羣小夜殪之盡其家一十有二人死陽訴於公公訊又服淫祠多見焚毀司有五顯廟碎其像易以清獻趙公神主寅窠相觀濁風為之一變在廣東廉問疾苦而罷行無倦挺身當怨必欲事事不涉厲民補吏以書工拙才遲敏為屬大小事劇易之差竒請杜絕公堂宿垢滌以盡貴則又然巡撫一居鎮靜吏不敢欺士民相安其愷悌凡歷四省兩直隸人愛若親父

母巡歷願先入為快留則樂去則憂別則走送泣下惟
不利於貂璫及為眉州宜興二柄要不樂宜興至死猶
追憾予巡視江西適椒邱物故為疏請諡并致不平於
公畧曰臣聞彭韶何喬新在刑部屬並負時名積官俱
至尚書韶忠亮懿醇喬新貞方恭慎又各儒術精究吏
事熟諳得古人之深以同任天下之重當時言完名純
德文學政事節槩屬心焉韶歿有贈有諡具悉聖天子
優異名德盛心然韶文有也忠與正與肅與獻則又有

也不知議諡之時何取惠安之義率不類其為人無足服中外之心以取後世之信欲下廷議易諡與椒邱兼畀以文事雖不行士論稱為快嗚呼公則固遇矣道大行矣然非究其至也端毅椒邱我公弘治初年三大老盡矣由今視昔其有餘慨焉公所著有從吾滯稿若干卷奏議一卷名臣錄贊三卷政訓一卷天曹日錄秋臺錄北岳代行錄各若干卷續修莆陽誌十卷成都誌二十五卷某生後迹疎風味同也銘其容已耶銘曰皇明

撫運世有文武元貞氣完嶽降申甫烈烈惠安遇我英
宗又我憲宗又我孝宗純誠允諒忠蓋始終邃學壯猷
茂揚中外人有鳳麟國有著蔡弘治大老端毅椒邱公叅
其間千一其流基有唐虞翊有堯舜爰及都俞天子之
聖帝念遺德曰予易名曰予贈祭曰予經營言則惠安
兩峯峩峩萬目之觀

明進榮祿大夫太子少保工部尚書劉公神道

碑

弘治丙辰資德大夫正治上卿工部尚書劉公梅坡三
上章致其仕情懇而詞益哀孝皇帝憐之加太子少保
還之延平途給驛家給廩月為石者三給役歲為名者
四所以優念者勤複上即位就家進榮祿大夫優游鄉
梓者一十有六年正德辛未以上距宣德己酉壽八十
三以逝訃聞上賜祭者二啓萬夫人鳳山賜藏合焉公
諱璋廷信其字幼孤萬夫人安節忍貧育教之遂知奮
勵砥行劬書闕闈一室聞如也天順丁丑第進士為戶

部主事郎中佐會綜禁吏無得眩筐以窺微利稍暇繙
閱書史以開廣聰明暢文辭而精之隱然公輔之望不
涉速化久之叅大政山東東人饑道殣相望薰蒸成大
疫同官五人染其三以死公視無怯水爭蛟龍陸走埃
氛窮僻邑以至倒庾勸分藥病而掩骼心力俱盡民全
活為多遷浙江右布政使尋轉左浙歲儉米二十有二
萬而畸軍食告匱幾為變公徑支積餘二萬五千兩給
軍方請後聞之罪時王端毅公為巡撫賢而容之公復

經理為後繼者疏存留鹽鈔易以米而稽其屯之額以
為定支窮見至隱利孔塞吏奸挾於是用給猶餘藩之
政為之一清擢總督江淮漕運兼巡撫右副都御史時
河洛饑南京主事張倫疏割漕米八十萬石由黃河入
汴以濟憲廟可之命公運其七倫運其一宋漕規江不
入淮淮不入汴河性悍急非江淮之舟能濟倫未考也
公募巨艘與習河勢者並運而前覆者溺者核其實無
問河洛得濟民全活又多明年江淮饑公先事處分做

范文正富文忠拯濟諸法舉而行之蠲其租罷其歲輸
供應民全活又多鄖襄蝗大作公又巡鄖襄有夢者曰
巡撫至蝗滅公至大雨蝗水死以盡又巡四川令民輸
粟補吏稽司屬贖刑入粟之多寡以驗廉墨積以石計
者百萬而餘人疑其迂比再歲連饑深賴為濟不足猶
取粟於荆溯游而上始服老成計事之蚤民全活又多
其他復竈丁之輸銀解部以准除鹽課種馬限年責駒
以二歲始以二十歲止為常解備用馬匹不責地產定

為直匹一十有二兩解部與寺給軍自買而會驗其直
之當印馬改差御史代武臣以杜漁利運軍京衛外衛
一體支米在淮南時也刁農鶩兒鶉鴿烏都難公五寨
夷負險絕糧道公宿兵二路示夾攻以智將提勁兵入
問其罪夷懼誅降播州宣尉楊輝溺愛其庶子友賄其
鄉當軸為立安寧宣撫而官之友遂謀奪嫡誣其弟宣
慰愛友反謀下刑部侍郎何公喬新偕公案驗發其奸
除其司割平越一所官兵守之友褫職銷印置之保寧

周防慎密部下帖帖以靖在蜀時也入為工部侍郎遷
南京禮部尚書又入為工部尚書營建節省與彭公從
吾張公時敏同時稱古意公不治生產既歸敝屋猶故
戶之稅不盈一石童僕鬻販自給裕如也謹潔宣整無
躁動無疾言舉武不差尺寸三事標表有東郭順子之
廉子產之惠一念人國庚午予再起征監深惟進止之
盤則以問公公曰事關安危在老夫即日起是時公八
十餘矣老成憂國杜祁公是心也劉有厚德祖彥高者

通俱錦衣衛正千戶累贈資政大夫工部尚書祖妣鍾
與妣累贈夫人配累封夫人子三男皆不舉一女嫁為
蔡指揮貴妻亦卒為公後者從孫華親賢擇也嗚呼謂
有公嗇一後若是耶天之道何如弘治初詔大臣各舉
堪為藩臬長僚者公舉俊時與公未相識也古者辟薦
不謝至死則赴弔公非俊知己墓道之文容非俊責耶
公所著有梅坡集清永成一家言賢聲偉績義得易銜
名董狐之公宜不為身後冷熱異態意有待耶詞曰光

嶽精英鍾為鉅人生此王國為鳳為麟天佑皇明七葉
神聖作周於禎不顯以盛明良四代公起其間靖共慎
密有重如山不競不綵於惠且直士以範型民以衣食
敷歷中外肅肅在公帝曰勞臣作朕司空有譽有年禮
不筋力寄懷故棲良坎丹碧言歸言旋於狎巢許松桂
盤桓海鶴儔侶物忌於完白傅弗嗣士會亦新御龍孫
子

明封文林郎大理評事林公槐庭墓誌銘

封評事槐庭公之卒也子知府富由寧波來奔塋石門
奉公從父弟按察副使孚可所具狀請銘其墓公林姓九
牧端州之裔予族諸兄也英爽美姿儀銳心問學從世
父凡曲靖知府舜卿公治經既夜午猶書聲琅琅予為
之私愧曲靖公既進士意必及公久之知厭舉子業以
詩自鳴羣體雜出往往有奇思率直善飲飲人飲於人
無不盡量防畛不設而不流為同公私事無一遺落事
尊府封順天推官公彌宣妣贈安人友其弟考功郎中

孰黃氏方氏妹盡子道兄道孰富教均而嚴遂同第進
士京推與公同日官封富忤逆璫落評事為丞潮陽尋
又勒致仕猶惡報紛沓公憂憤鬱結一付於酒家常苦無
繼曰恨不為東臯子待詔門下日給酒一斗彭澤令公
田盡種秫李翰林裘馬易醉嘗酬賀客按五香法造酒
二石自飲其七客僅飲其三逆璫既正法時事就清富
起郡丞尋轉守公斷飲自制而疾已弗治正德癸酉六
月念又三日也生景泰辛未六月二日年六十三娶鄭

教授遷善公女繼方教諭和叔公女封孺人子即富女
嫁郭汝華朱道明黃於深鄭以調孫萬仞一陽四明孫
女二曾孫曰金墓在公曾祖同知洪公左壠與祖潛夫
公面相望塋公從右次則方壽藏富之婦張婦翁二孺
人左而祔焉嗚呼公學不事進取聲色俱澹而行無可
疵獨未忘情於酒其達耶托而逃耶抑心固無醉與流
俗之溺異矣富趣尚甚勇不竒曲以直安壚鞫行理有
聲可謂有子矣銘曰仙籙謫真下為逸人隘視物表九

宇一塵雅調傑詞陶情阮思有戢其華寓醒於醉有作
有述衆湊羣和神理忌完蘭摧玉破禪梧新桂有蔚斯
阡有騰晶英有葉有年

明承德郎致饒州府通判事林公古廉墓誌銘

饒州兄源庵公之疾某視之日再至比卒哭而深悲之
士夫耆人援私謚於某曰貞曜貞晦者例也私謚源庵
無古廉宜二庠生復言之提學姚公英之與在鄉賢祀
典公孫夫方方伯壽卿為謀掩幽之石陳氏甥提學王

疇為具事狀子璧孫乾芳奉以請嗚呼是銘也無所謂
伯夷傳郭公有道之碑者歟公志尚高古視世齷齪無
足當其意所生父監元公時樂母吳孺人也愛之專所
後父邑博公時望母吳孺人也愛之又專邑博之遺女
兄弟曰與則與曰優則又優自薦丙子凡五試禮部竟
就吏部試通判饒州自安澹苦粗綿大葛食一菜公出
食亦一菜間以細鮮廩餘責之供者以去人稱菜林當
事直前無忌避輪蹄輒輒遍湖之東西風宣滯流人得

安事分豪食風為阻鄱陽珠湖藩府專為利永豐湖田
要人亦專為利公盡奪還民上供陶器主者為居竒公
疏其擾德者廣以泛柄要之忤獨積以專吏部課在優
等一日傳落本有名侯察使嚼齒戟髯抗聲白其屈曰
江右官皆可去洪不可去部為慚忤然竟無敢抗以解
朝論大譁江之西又大譁饒又大譁留之既不可送之
境上羣號泣為別別既盻盻自失子良廉毅羣繫戀有
今焉嗚呼其亦可偽為耶公挺身當怨心嘗在民不涉

為妻子私地督運京儲途費以代民輸俸餘以築公路
官九年囊僅百金猶幸先人遺業配王安人銖累粒計
百意為挽拽饒仕閩者為立其子故食宿給衣無至褻
裂晚年祿養於子以裕身為物觀義必先倡俚兒舉事
惟恐及公知為短於是乎有型範焉卒正德壬申八月二
十二日年八十三子珙璵先卒壁驛丞汝明典史孫八
人曾孫六人女孫女十六人雲洞祖塋右股公遺蛻在
焉嗚呼吾林仍襲清白僉事公會歿無棺中允公長懋

名萊林員外公長清敞袍自適孤風遠韻鄉族炯炯然
至於今光氣廉濁立懦公嗣有餘烈矣公諱漢字曰景
源銘曰叔風襲流物惡其上競附羣趨芳潔誰諒鶴琴
世遠落落無同一錢盃水先生之風

明贈承德郎戶部主事前埭鄭君敬軒墓誌銘

鄭名大姓倡莆學以振初響湖南三先生也三先生露
為盛居前埭者四世孫評事臯始與林鱗次仍世有媿
二祠翬接每旦日林詣鄭鄭亦詣林交拜祠下成禮而

後去龜組承襲二姓相頡頏青烏家附會之有前埭一
青龍之識久之鄭仕籍稍稍異猶儒官肩立予年友瑗
猶舉進士為儀制郎中有名啟學源清之父子雖雌伏
林下猶隱隱然儒紳風素農末作恥之家竟落傳敬軒
殆不可為支柱猶強挽拽續口食時弟妹之昏嫁其執
役海上也主帥廉其畏謹引入幕其所主畫往往符法
意有過政扞護開解德者多以無怨成化丁未以上去
乙亥裁三十有三年忽疾轉亟人曰邦禮子玉方九齡

璁呱呱然在襁褓家如懸磬何恃死謀為醫禱弗效方是時玉無昌黎氏之凡嫂孤疚無瘳附皇甫氏之外家其有異范文正之境者乎而堅忍自割若無其貧固知鄭氏有後也稍長眉目清發其美如冠玉錄竒書輒心記為高南窓鑒識延教家孰黃潘叅仲子瑞普異之妻以女玉領鄉薦上春官留教浙浙閩帥崔君胤之子衛帥某又異之又妻以妹辛未玉第進士為戶部主事以年勞贈君承德郎戶部主事玉配贈封皆安人物色

者之望其副耳矣清門落姓所恃者澤未斬耳譬之古
木枯悴重若可憐而孤根未撥由蘖漸長拂青烟而凌
層漢固有待也鄭之起亦執然者重以玉之自振耶予
名好獎士玉與王秋官時行始發解以予一日長來詣
雲庄深器許之二君果善植立孤蹇中以自標異遂為
來賢私慶幸名家之有後而玉得勉伸情事以銘予請
嗚呼是固起墜之觀世風者之責玉之志可哀而玉君
之狀其足信也其容辭其容辭君諱楹邦禮者其字碧

瀨之山鄭之祖知府郎中公之藏之左祖之藏卜焉祔
祖者君正德乙亥正月庚午者葬日也銘曰有歷亦年
有施亦仕有要終竟曷齊曷否有美而貧衰莫心死視
履考祥有粵賢子龍光離離岡樹騰紫

光祿大夫太子太保兵部尚書劉忠宣公神道

碑銘

國家仁育區內元氣毓和名人間出以茂贊鴻猷弼成
弘治之治若東山公殆非偶然者公諱大夏字時雍上

世東平劉氏宋都統制寶從岳武穆平湖南隱華容之
東山十三傳為公未名楊文定公為之名未冠黎文僖
公成之學發解首為進士為庶吉士與李文正公同讀
書中祕主事職方郎中車駕而復為職方也名逾起中
貴人獻取交南策索故籍匿其籍朝鮮貢道由鴉骨關
迂迴數大鎮達京師奏由鴨綠江便公曰祖宗微意孟
密賂立安撫為滇夷患固有以阻之於先者矣敵犯雲
中師失律檄書告急倉劇有餘辨權璫大異屬意薦少

司馬亟求叅知閩藩進兩轄尋進副都御史有事河決
自上流孫家渡疏三十里四府營疏十里聯長隄以分
大名山東水勢而別河張秋之南以行運舟河就馴壘
書褒賞入為戶部侍郎宣大便就糴為勢家利公別儲
募商民寬士飽乞告起左都御史總督兩廣軍務兩鎮
出私卒十三村藪盜為之衰止入為兵部尚書召問所
辭故曰民貧恐生變本兵重地臣無敢來數日再問徵
有常制曰近恐不止常制問兵曰與民等貧舉鐸木香

材無藝之征與轉漕番操了責私役諸苦上曰豈知至是詔諸司條弊政與分外之徵疏聞淮南思變為寢問歲儲不給財何在曰廣闔省歲廩與中鎮歲索猶不相當上諦思久曰求如鄧原麥秀者用無寧已蓋廉瑄也又問安得泰平如帝王時曰求治亦難太急但如近日與臺閣議當而行又之自治苗達乘敵報欲劫營上語公因及永樂時破敵之意公曰當時邱福兵俱陷近河套亦幸免且今兵力不逮未若戰守為計時戴莊簡公在

側贊是言上曰微二臣言幾為所誤耳肅副將魯麟恃
部落要大將不遂棄歸願撫其衆奏至上問公公曰第
叙其先世歸附之勞從其奏兵權去無能為麟果怏怏
死是時上慨然君臣相與之盛凡召公偕莊簡為多名
而不官至幄前左右却立大政事大封拜大釐革密議
移時間及左右未對曰畏之乎曰猶疑朕聽寺人言乎
語久起踉蹌行上老之令扶以出不受私贊與金請老
命溫旨為諭留有間密語之備忌公無獨異流然者薊

州密雲保定繕城增戍奏還其番閱萬兵隱然京師兩
腋有造飛語宮門者上曰是豈外人可到有不得私役
是軍者至是上眷益深公之任益重知無不為世方改
視而孝廟升遐公亦致其仕去柄移逆瑾縉紳羅致以
盡尤甘心於公芳宇贊之逮致詔獄得屠公瀟救解猶
戍甘肅瑾誅釋還道復光祿大夫太子太保兵部尚書
歸六年丙子五月晦日雷電風雨大作已公歿壽八十
一高祖光祖曾祖必弘至祖御史公行簡父察副公仁

宅並贈兵部尚書妣配並贈夫人公開朗平粹休休然
樂善貴不忘貧與人言忠孝教士廉謹教子孫士農不
乞蔭預卜壽藏所居西五里僅記其履歷大都久之追
賜塋祭謚忠宣錄其一孫國學俊忘年味似虞公夢公
率寓詩於隱公亦為予私念更燭情事無復山東聽雨
時矣神道之文祖修之請抑公之欲也公清約如知白
先憂如希文公望如彥國能處大事如子明忠結主知
望實孚於中外問安否於裔夷其任其止其世可知也

銘曰粵古在昔嶽降星精邃猷方格坐廟以行黃髮詢
茲底裏孚契如水如魚於斯允儷良臣惟聖商實維賢
於是獻替一日三宣風時海馴遺弓斯泣悠悠蒼天斯
日何日泰陵昂昂岳俯一方公化在東公神在旁

明奉政大夫山東按察僉事中江劉公墓誌銘

五清劉先生尊甫奉政公之歿去今四十有八年有狀
有表傳者四而銘闕焉以屬於俊曰瑞無有苟爾矣嗚
呼俊惡足當先生之辱哉友其子以銘其父宜公諱時

數字用行別號素庵曾祖得賢元季避地自平江徙內
江之中江居焉傳友義傳鑑是為公父封承德郎刑部
主事母曾封安人劉世德隱承德公尤孝讓以載植有
家六子伯氏仲氏有仕偕意尤獨公乎異責所必成公
亦力取自副年二十五魁於鄉又四年甲申第進士為
刑部主事轉員外郎又轉山東按察僉事分按東兗
終訟積數百事逮數千人就繫動數三歲公裁決浹月
而盡訟為之衰濟南北旱先期民禱蠲租平糶藥疾食

瘠招流而瘞殍力且匱獻計巡撫以亟請於上得發米二十萬石銀四萬五千兩錢五百五十餘萬民賴全活東人安公公亦不東乎薄也甲午巡淄川疾作猶強歷數縣至長清輿還越七日起二月二日也年三十九察使王君琳提學楊君琅檢其笥敝袍數襲俸遺無十金問其僕泣曰官人祿致二親故業讓伯仲而盡無獨無歛存亦無生為也偕僚貳悲之時五清穉弱田太宜人慟哭五清亦慟哭哭絕復蘓復慟哭聲不忍聞又

悲之相與為歛言之巡撫為護歸其喪於是丁酉乎莖
公高亢勁直法用仁施仕不學廢視天下事若不足為
權璫有事於東躋先避青守假力求薦考竟下庶僚甄
別銖兩不渝覈邊儲議兵食風裁駁發臺察無過者著
述思親有說自警有箴教子有記凡詩文有集在同年
友李文正公郎署友彭惠安公張莊簡公意皆有所到
公獨不謂然然有子五清文重詞垣忠讜動於朝著以
有茲貳卿公進奉政大夫田進太宜人後之償未艾三

公或未然者五清即瑞娶汪封孺人孫峽孫女峽墓太平先
塋左次銘曰楚時蜀居此維與宅松茂竹苞爰續維百
儲祥啓淑篤生臺臣四時屈蟠世舊而信庭絕寃稱巷
有頌語賑食奚從天子之所人肥我瘠厥疾用罹於賻
乃殮黑風辛悲家乏寸遺目有餘瞑言嗣徽音厥終有
命

明進資善大夫四川右布政使致仕例進一階

翠渠周公墓誌銘

昔者壺山崩或測所應於予予意必翠渠翁一夕夢登
公堂空一機書歸休二字其上覺而測曰噫歸死也謂
息為之休空一機世機乎息矣行其庭不見其人公殆
爾矣時壽八十九未數月果病移席中堂子大謨鎮海
掃松乎至遂逝正德戊寅七月八日也嗚呼其不可作
矣周出清江上廊仕族公諱瑛字梁石號蒙中子白賁
道人翠渠其最後號也父諱舉贈奉直大夫知州尺籍
鎮海公生鎮海長於莆神鑒臞古博學善文往往有奇

悟景泰癸酉為主司聶大年所知置魁亞又與陳公公
甫賀公克恭友善危論高氣間取夫名者之忌第進士
出知廣德州賢旌授誥然猶歷九載始南京儀部正郎
又三年守撫州又五年移簡鎮遠夫以清華論思之選
臺省之屬曾無公一席之地必州外之久淹之南冷之
撫困之至居夷而極矣王端毅公為上宰進公四川大
叅尋右轄端毅去公亦服憂潘太宜人既望七之年無
用世志矣言者薦公可用孝廟意有所屬而公以老請

遂進資善大夫致仕尊號例進一階公政用寬繼用嚴
繼復靜暇舉之教民有禮課士有程不舉女有禁祠山
有辯陂水利著政本第輸納著政均立保甲著政原鎮
不鄙夷其民文教之修亦發端於此矣藩政別立老格
猶以古見迂世之求人者蓋亦詳矣公廣德有祠有志
蜀有志今吏能固少也性不視生產祿入娶三婦嫁其
七女急義期功之承凡出費無問大謨出亦無問家竟
落雷尹應龍助以金於是白雲乎墓配先宜人陳繼宜

人吳吳今壽八十四子大櫟先天大謨取兩魁為進士
亦天南鳳南鵬南鸚三孫傑立後之起足信所著有翠
渠集經世管鑰律呂管鑰字學纂要詞學筌蹄地理著
龜周易叅同契本義漁仲潛夫力取嗣響子上之學亦
深有意焉子族孫僉事近龍公子壻也狀事行請銘予
敢操是筆告夫公者前輩舊學抑予銘信也銘曰藏聲
卷迹魚水是逢不有偶也齊瑟徒工蒼珮彤班天顏咫尺
不有偶也朝不一日弗副其長以須其左牧其疲人

天子命我退而有作尚白誰立粵有揚子我公其傳

見素集卷十九